



Tenor la Magistraglia grischuna èn las mesiras da la scola integrativa sa cumprovas en la scola grischuna.

# Mantegnair vinavant la scola integrativa

La Magistraglia grischuna prenda posiziun tar las intervenziuns personalas dals deputads Gian Michael (pbd) e Bruno Claus (pld)

DA MARTIN CABALZAR

■ **La «Magistraglia grischuna» – l’uniun tetgala da las persunas d’instrucziun dal Grischun – renviescha l’incumbensa da deputà Gian Michael ch’intenda da reintrodur la separaziun d’uffants cun basigns speziels. Perencunter sustegn ella l’incumbensa Claus che vul reintrodur classas introductivas.** La Magistraglia grischuna sustegn uschia cumplainmain la posiziun dal departament d’educziun e da la regenza.

## Na a l’incumbensa Michael

En il Grischun sco en auters chantuns dat la lescha da scola vertenta la precedenza a furmas da scolaziun e promoziun integrativas avant talas da gener separativ, uschelunsch che quai è d’avantatg tant per ils uffants e giuvenils pertutgads e per la classa regulara. L’intenziun da l’incumbensa parlamentara da deputà *Gian Michael* e ses 55 consignants è da considerar las duas furmas d’instrucziun sco equivalentas. «Quai muntass ina libra tscherna, quai che na resguardass betg exnum il bainstar da l’uffant e na correspuendess betg al dretg surordinà», constatescha la Magistraglia grischuna en ses communitg da pressa. L’applicaziun flexibla da la

lescha sco ella vegn pratigada oz tegnia quint dals princips pedagogics. Tar l’applicaziun da la moziun Michael vegnessian probabel finamiras finanzialas e betg l’interess da la scolaras e dals scolars a star en il focus.

En in segund punct vul l’incumbensa Michael spustar las competenzas davart la promoziun integrativa e da la prevenziun dal chantun sin las vischnancas. «Quai na po betg vegnir responsà dal punt da vista pedagogic», scriva la Magistraglia grischuna. En quest cas existia numnadain il privel che las vischnancas decidian sut squitsch finanziel davart il bainstar da l’uffant. Quai manassia er a cundiziuns da sustegn inegualas tranter scolaras e scolars. I dovria er en l’avegnir criteris pedagogics e professionals per la furmaziun e la realisaziun da lecziuns da la pedagogia curativa. La prevenziun saja dal reminent la pli favuravla mesira per evitar pli tard mesiras da promoziun che custan fitg bler. La promoziun integrativa tar la prevenziun saja ina da las pitgas impurtantas da l’integraziun e saja er in avantatg per la classa.

## Gea a l’incumbensa Claus

La direcziun da la Magistraglia grischuna taxescha la resposta da la regenza sin l’incumbensa da deputà *Bruno Claus*

(pld Cuir), che vul puspè reintrodur classas introductivas en il Grischun, sco in bun impuls. Senza violar il princip da l’integraziun possia la scola resguardar ils basegns dal singul uffant entras mesiras da flexibilisaziun. Il directur da la Magistraglia grischuna beneventa il fatg che la regenza è pronta d’examinar mesiras che lubeschian da promover adequatamain uffants che dovan al cumenzament da la scolarisaziun dapli temp.

Tenor las represchentantas ed ils represchentants da la Magistraglia grischuna haja il chantun Grischun obtegnì cun la nova lescha da scola bunas pussaivladads per realisar mesiras da la pedagogia curativa a moda integrada en la scola populara. Per il directori da la Magistraglia grischuna èsi impurtant d’obtegnair soluziuns flexiblas e cunvegnetas a la situaziun. La pratica mussia che soluziuns flexiblas che correspundian al dretg surordinà sajan pussaivlas grazia a la legislaziun vertenta che saja fitg moderada. La scola integrativa en il Grischun saja sin buna via. La Magistraglia grischuna è persuadida che meglieraments sajan pussaivels entaifer il rom legal vertent e duain perquai vegnir examinads regularmain ed optimads sin fundament dals fatgs e sche quai fa basegns. Pertge integraziun saja in process permanent.